



PCN ta kumpra ikóniko Scout's Place na Saba

Stichting Pensioenfonds Caribisch Nederland (PCN) a finalisá kompra di Scout's Place na Saba. Ku e kompra akí PCN ta realisá su di dos invershon na Saba den algun luna.

E atkisishon ta enserá e hotèl inkluso bar/restorant, i tambe un parsela den banda na Windward Side. Scout's Place ta un estableimentu úniko na Saba, ku un historia largu i riku i ta bon konosí i gustá serka tantu e poblashon lokal komo turistanan.

Harald Linkels, presidente di e direktiva di PCN, ta hopi entusiasamá tokante e kompra: "PCN a ekspresá anteriormente di kier invertí mas riba e tres islanan BES. E di dos kompra na Saba ta kuadra perfektamente den e maneho di invershon lokal, manera stipulá pa e Fondo. Banda di e rendimentu positivo ku ta premirá pa e fondo, pa PCN ta di gran importansia ku ta realisá ku e kompra i renovashon planiá, un aporte ekonómiko i sosial na e komunidad di Saba." Linkels ta bisa di kier gradisí Barbara Tooten tambe pa su esfuerso pa logra e transakshon, i tambe otronan ku a duna un aporte importante.

E bia akí tambe e invershonnan ta tuma lugá atrobe pa medio di un vehíkulo ku a lanta speshal pa esei, esta e Participatiemaatschappij Caribisch Nederland (PMCN), un filial 100% di PCN. Walter Blijleven, direktor di PMCN, a hasi e preparashonnan i hiba e negosiashonnan. "Pa motibu di sirkunstansianan desafortuná Scout's Place a pèrdè un tiki di su atrakshon. Nos empeño ta pa no solamente restorá i modernisá Scout's Place den su antiguo gloria, pero pa te asta ampli'é despues di tempu. Esaki lo tin un impakto importante pa ekonomia di Saba. Banda di salvagardiá empleo awor i den futuro, nos ta spera ku Scout's Place lo bolbe logra atraé turistanan pa bin Saba."

Awor ku e kompra ta un echo, PMCN riba término kòrtiku lo kuminsá traha riba e plan di renovashon kaminda ta hasi esfuerso pa embolbí partidonan lokal optimalmente. Pa futuro eksplotashon ta hibando kombersashonnan ku diferente partido.

"Finalisashon di e kompra akí, meimei di e era di Corona, ta indiká ku PCN ta determiná pa duna un aporte esensial na futuro di Boneiru, St. Eustatius i Saba i ku nos tin konfiansa den futuro di e tres islanan presioso akí", segun Linkels.